



Svečana sjednica Senata Univerziteta u Sarajevu
02. decembar 2022. godine

Obraćanje prof. dr. Rifata Škrijelja, rektora Univerziteta u Sarajevu

Poštovani predsjedavajući Predstavničkog doma Parlamentarne skupštine Bosne i Hercegovine, prof.dr. Zvizdić,
Poštovani predsjedniče Akademije nauka i umjetnosti Bosne i Hercegovine, akademiče Čičić,
Poštovani predsjedavajući Skupštine Kantona Sarajevo, g-dine Okerić,
Poštovana ministrica za nauku, visoko obrazovanje i mlade Kantona Sarajevo, prof.dr. Nikolić,
Poštovani ministri u Vladi Kantona Sarajevo, te ostali zvaničnici svih nivoa vlasti u Bosni i Hercegovini,
Poštovani članovi Rektorske konferencije Bosne i Hercegovine,
Poštovani predsjedniče Upravnog odbora Univerziteta u Sarajevu, prof. dr. Ramadanović,
Poštovani članovi Upravnog odbora Univerziteta u Sarajevu,
Poštovani članovi Senata Univerziteta u Sarajevu,
Profesori i studenti,
Dame i gospodo,

Želim vam iskrenu i srdačnu dobrodošlicu na Svečanu sjednicu Senata Univerziteta u Sarajevu koju organizujemo u povodu obilježavanja 73-e godišnjice Univerziteta u Sarajevu. Prvi put, nakon 2019. godine, kada smo slavili 70 godina rada i postojanja našeg Univerziteta, okupljamo se u ovom svečanom formatu u fizičkom okruženju, nakon iscrpljujućeg perioda pandemije od čijih posljedica oporavak tek slijedi. Nažalost, moram reći, ni današnje okolnosti nisu nimalo svjetlije, svjedočimo ratnim slikama i ljudskim patnjama koje su duboko urezane u naše sjećanje i svakodnevno strepimo od ekonomskih, energetske, socijalnih i mnogih drugih posljedica dešavanja u Ukrajini koja imaju globalni efekat. Bez obzira na ovaj kontekst, Univerzitet u Sarajevu radi i razvija se u nastojanju da opravda svoju ulogu visokoobrazovne institucije koja jeste, kako sam to rekao i 2019. godine, neodvojivi dio savremenog bosanskohercegovačkog društva i države.

Obilježavanje 73-e godišnjice u Vijećnici me naročito raduje, jer je upravo 1949. godine, u Vijećnici održana prva Univerzitetska skupština Univerziteta u Sarajevu, a za njegovog prvog rektora izabran dr. Vaso Butozan. U ozračju koje je bilo obilježeno zajedništvom koje je možda bez presedana u našoj savremenoj povijesti, uspostavljena je institucija koja je u samim temeljima bosanskohercegovačke države i društvene zajednice, te je i danas posvećena ideji zajedništva među ljudima i narodima. Ulogu osnivača Univerziteta u Sarajevu te 1949. godine imala je Skupština Narodne Republike Bosne i Hercegovine koja je i donijela Zakon o Univerzitetu. Iako su se naše društvene okolnosti promijenile, te je danas Skupština Kantona Sarajevo osnivač Univerziteta, veoma sam zahvalan novoizabranom predsjedavajućem Predstavničkog doma Parlamentarne skupštine Bosne i Hercegovine, prof.dr. Denisu Zvizdiću koji je danas ovdje sa nama u funkciji predstavnika najviše zakonodavne vlasti u Bosni i Hercegovini koja je prije 73.

godine donijela historijsku odluku o osnivanju Univerziteta. Zahvaljujem se Gradu Sarajevu i gradonačelnici, dr. Karić, te JP „Sarajevo“ na podršci u organizaciji Svečane sjednice, te najavljujem da ćemo, uz njihovu dalju podršku, ovo obilježavanje 2. decembra u Vijećnici ustanoviti kao tradicionalnu manifestaciju.

Naše decembarske dane tradicionalno posvećujemo promociji diplomanata i magistranata, doktoranata, profesora emeritusa, a ove godine promoviraćemo i počasnog doktora Univerziteta u Sarajevu, dr. Edmonda Offermanna, kao i ambasadora Univerziteta - Ismaila Abu al-Bandori. Koristim ovu priliku da se ovim članovima naše akademske zajednice, dobitnicima zvanja i titula, nagrada i priznanja, koji su svoje životno i akademsko djelovanje vezali uz Univerzitet u Sarajevu, zahvalim na njihovom izboru i odluci da putem akademskog ostvarenja daju doprinos našem društvu i državi.

Obilježavanje godišnjice, pa tako i ove, 73-e, našeg Univerziteta je jedinstvena prilika da se, pored nagrada i priznanja zaslužnim pojedincima i institucijama, na trenutak podsjetimo na naše rezultate, ostvarene u prethodnom periodu. Sa naših 22 hiljade studenata, što je 30% ukupnog broja studenata u Bosni i Hercegovini, 500 studijskih programa i 1700 nastavnika i saradnika, odnosno 20% od ukupnog broja nastavnika i saradnika u Bosni Hercegovini, predstavljamo najveću instituciju visokog obrazovanja u Bosni i Hercegovini.

I dalje održavamo najveći postotak upisanih srednjoškolaca, a u odnosu na broj stalno zaposlenog osoblja i studenata ne zaostajemo za regijom. U periodu od 2016. godine ponudili smo 41 novi studijski program, 261 studijski program smo reformirali i inovirali, realizovali 48 programa necikličnog obrazovanja, promovirali više od 31 hiljade diplomanata i magistranata, te preko 700 doktora nauka i umjetnosti. Razvojem savremenih i dinamičkih studijskih programa koji u sebi pored naučnog i umjetničkog sadržaja posjeduju i inovativne i preduzetničke komponente, mi pratimo evropske trendove koji nam omogućavaju da i dalje obrazujemo kvalitetan kadar koji može odgovoriti na izazove sutrašnjice. Kontinuirano rastemo u pogledu broja naučno-istraživačkih projekata, a dodijeljen nam je i logo za izvrsnost u istraživanju Evropske komisije.

Koncept integrisanog, ali decentralizovanog Univerziteta, svakim danom u sve većoj mjeri postaje naša realnost. Ostvarena akademska, finansijska i pravna integracija već daje rezultate u pogledu boljeg uvida i kvalitetnijeg upravljanja cijelim nizom funkcija i procesa, ali pred nama su još uvijek brojni izazovi. U suočavanju sa njima pomoći će i novi Zakon o visokom obrazovanju Kantona Sarajevo koji je došao kao moderno zakonsko rješenje u oblasti visokog obrazovanja, donijeto u javnoj raspravi i konsultacijama širokog obuhvata, te uz aktivan angažman cijelog niza profesora i stručnjaka Univerziteta u Sarajevu kojima se ovom prilikom, zajedno sa timom Ministarstva za nauku, visoko obrazovanje i mlade Kantona Sarajevo, srdačno zahvaljujem na uloženoj energiji i naporima. Rad na provođenju Zakona se nastavlja kroz pripremu podzakonskih akata, te našeg novog Statuta i dodatnih provedbenih propisa.

I proces informatizacije kao jedno od naših strateških opredjeljenja nezaustavljivo napreduje. Iza nas je još jedan uspješno organizovan on-line upis nove generacije studenata. Ipak, on-line upis je samo jedan od segmenata krajnje složenog procesa informatizacije u kojem ključnu ulogu igra naš Univerzitetski tele-informatički centar čija softverska rješenja se koriste širom Bosne i Hercegovine.

Univerzitet u Sarajevu veliku pažnju pridaje saradnji sa javnim univerzitetima u Bosni i Hercegovini i sinergijskom djelovanju, što je ujedno i uslov za razvoj visokog obrazovanja u

Bosni i Hercegovini, ali i za jačanje pozitivnog imidža visokog obrazovanja naše zemlje. Nemjerljiv je značaj međusobnog usaglašavanja svih javnih univerziteta u Bosni i Hercegovini o temeljnim pitanjima od strateškog značaja za razvoj visokog obrazovanja i nauke u našoj zemlji, a uspješna saradnja koja se odvija na nivou Rektorske konferencije/Rektorskog zbora BiH doprinosi dostizanju najviših akademskih standarda. Naročito me raduje što rad Rektorske konferencije/Rektorskog zbora BiH, zasnovan na otvorenom dijalogu, razumijevanju i uvažavanju, dobroj volji za postizanje konstruktivnog dogovora, vidim kao svojevrsno ohrabrenje, poticaj i dobar primjer za širu društveno-političku zajednicu. Na svemu ovome izražavam duboku zahvalnost svojim kolegama i kolegicama, rektorima i rektorica javnih univerziteta u Bosni i Hercegovini.

Ističem i nikada bolju saradnju sa Akademijom nauka i umjetnosti Bosne i Hercegovine. U svim značajnijim procesima koje smo vodili u proteklom periodu izuzetan doprinos su dali akademici i akademkinje ANUBiH. Naročito naglašavam njihov angažman u našem Savjetu za nauku, te učešće u brojnim projektima. Potaknuti ovom kvalitetnom saradnjom nedavno smo potpisali i Sporazum o saradnji koji otvara brojne mogućnosti za našu čvršću saradnju.

U skladu sa evropskim trendovima, gdje se velika pažnja posvećuje internacionalizaciji univerziteta putem akademskih razmjena, moram reći da Univerzitet u Sarajevu raste u svim parametrima međunarodne saradnje, od bilateralnih ugovora, međunarodnih konferencija do mobilnosti nastavnika, saradnika i studenata.

Paleta aktivnosti kojima djelujemo u širokoj oblasti promocije i zaštite ljudskih prava proširena je osnivanjem Univerzitetskog gender resursnog centra (UNIGeRC) uspostavljenog u kontekstu jednog šireg, međunarodno podržanog, međuuniverzitetskog djelovanja, sa misijom promocije i zaštite rodne ravnopravnosti u univerzitetskom okruženju.

Osnivamo nove servise poput Centra za istraživanje i razvoj, Ureda za podršku studentima sa invaliditetom, jačamo saradnju sa privredom i okruženjem kroz zajedničke projekte i više od 200 potpisanih sporazuma o saradnji.

Infrastruktura koju smo u prethodnom periodu uspostavili sa ciljem podrške naučno-istraživačkoj funkciji Univerziteta daje sve bolje rezultate, a Univerzitet u Sarajevu bilježi konstantni porast u učešću u domaćim i međunarodnim fondovima namijenjenim naučno-istraživačkom radu.

Porast naučne produkcije na Univerzitetu u Sarajevu ogleda se i u značajno povećanom broju nagrada za rezultate naučnog i umjetničkog rada akademskog i istraživačkog osoblja koje ćemo dodijeliti ove godine u skladu sa Pravilnikom o nagrađivanju. Uslove za nagrađivanje ove godine je ispunilo čak 176 kandidata sa 29 članica Univerziteta u Sarajevu, dok će za umjetnički rad, te rad u disciplinama od posebnog nacionalnog značaja, biti dodijeljene 4 nagrade za ukupno 7 kandidata. Danas dakle u petoj godini primjene Pravilnika, broj nagrađenih uvećan je skoro 7 puta što dokazuje stimulativni uticaj vrednovanja naučnog i umjetničkog rada, te potvrđuje opredijeljenost da trend nagrađivanja naučne izvrsnosti svakako nastavimo.

Zahvaljujući podršci Kantona Sarajevo, Zemaljski muzej Bosne i Hercegovine je naša nova nastavna baza čije uključivanje će unaprijediti rad Univerziteta koji, istovremeno, daje jednu dodatnu stabilnost i sigurnost u poslovanju i radu Zemaljskog muzeja, institucije od nesumnjivog javnog interesa za Bosnu i Hercegovinu. Širenje nastavne baze ide ruku pod ruku sa našim trajnim angažovanjem na privlačenju mladih nastavnika i nastavnica i naučno-istraživačkih radnika i

radnica na Univerzitet u Sarajevu, gdje je naročito značajna saradnja koju ostvarujemo sa zvaničnim institucijama koje su nadležne za politike zapošljavanja.

Ne mogu izostaviti uspjehe koji se tiču naših kapitalnih ulaganja u infrastrukturu. Okončani su svi potrebni postupci i pregovori, te nas ovih dana očekuje i potpisivanje ugovora sa izvođačem radova na izgradnji Univerzitetske biblioteke. Prije dva dana smo na tematskoj sjednici Senata predstavili novi master plan Kampusa Univerziteta u Sarajevu, kvalitetno rješenje koje će nam omogućiti pristupanje finansijskim aranžmanima neophodnim za izgradnju najmodernijeg Kampusa u regiji. Da smo ozbiljni u našim namjerama koje se odnose na Kampus, možemo svjedočiti svaki dan šetajući univerzitetskim parkom u Kampusu koji je samo prije dvije godine bio krajnje neuređen i za akademsku zajednicu i građane nepristupačan prostor.

I pored očiglednih iskoraka, nastavljamo našu borbu za punu autonomiju Univerziteta u Sarajevu i akademske slobode jer samo autonoman i slobodan univerzitet može biti predvodnik općeg društvenog i napretka. Reforme i ciljevi ostvareni u proteklom periodu rezultat su našeg zajedničkog rada i truda, svih članica Univerziteta, nastavnog, stručnog, administrativno-tehničkog osoblja, i naše zajedničke opredjeljenosti za izgradnju modernog integriranog Univerziteta koji će unaprijediti našu izvrsnost, generirati zdravu akademsku atmosferu i njegovati trajni fokus na postizanje pozitivnih rezultata i ostvarivanje naših strateških ciljeva.

U našim nastojanjima značajnu ulogu imaju i mediji. Smatramo ih našim saveznicima i partnerima, jer razvoj i napredak Univerziteta u Sarajevu ima smisla samo ako se vodi u otvorenom, transparentnom i uključujućem procesu, a u tome je uloga medija gotovo od presudne važnosti. Iskreno se zahvaljujem na dosadašnjoj saradnji i naglašavam našu predanost njenom daljem unapređenju u predstojećem periodu.

Orijentacija Univerziteta u Sarajevu jeste i mora biti daljnja integracija u svjetske akademske tokove, jer samo tako možemo ostvariti svoju osnovnu misiju – prosperitet i progres društva u cjelini. Naša dosadašnja zajednička dostignuća bude optimizam i uvjerenje da su promjene moguće i dostižne. Pozivam vas da zajedno istrajemo u borbi za još bolji i još moderniji Univerzitet u Sarajevu

Hvala!